



## O'ZBEKISTON RESPUBLIKASI VAZIRLAR MAHKAMASINING QARORI

20 **24** yil « **10**» **dekabr**

№ **832**

Toshkent sh.

### **Ўзбекистон Республикасининг маъмурий-ҳудудий бирликлари давлат реестрини юритиш ва маъмурий-ҳудудий тузилиш масалалари бўйича комиссиялар фаолиятини ташкил этиш тартибларини белгилаш тўғрисида**

“Ўзбекистон Республикасининг маъмурий-ҳудудий тузилиши тўғрисида”ги Ўзбекистон Республикасининг Қонуни ҳамда Ўзбекистон Республикаси Президентининг “Қонунларнинг ижтимоий муносабатларни тартибга солишдаги ролини ҳамда норма ижодкорлиги жараёни сифатини янада ошириш бўйича қўшимча чора-тадбирлар тўғрисида” 2024 йил 19 февралдаги ПҚ–75-сон қарори ижросини таъминлаш мақсадида Вазирлар Маҳкамаси қарор қилади:

#### 1. Қуйидагилар:

Ўзбекистон Республикасининг маъмурий-ҳудудий бирликлари давлат реестрини юритиш тартиби тўғрисидаги низом **1-иловага** мувофиқ;

Ўзбекистон Республикасининг маъмурий-ҳудудий тузилиши масалалари бўйича республика комиссияси таркиби **2-иловага** мувофиқ;

Ўзбекистон Республикасининг маъмурий-ҳудудий тузилиши масалалари бўйича ҳудудий комиссиясининг намунавий таркиби **3-иловага** мувофиқ;

Ўзбекистон Республикасининг маъмурий-ҳудудий тузилиши масалалари бўйича республика комиссияси тўғрисидаги низом **4-иловага** мувофиқ;

Ўзбекистон Республикасининг маъмурий-ҳудудий тузилиши масалалари бўйича ҳудудий комиссиялар тўғрисидаги намунавий низом **5-иловага** мувофиқ тасдиқлансин.

#### 2. Белгилансинки:

Ўзбекистон Республикаси Иқтисодиёт ва молия вазирлиги ҳузуридаги Кадастр агентлиги (кейинги ўринларда – Кадастр агентлиги) Ўзбекистон Республикасининг маъмурий-ҳудудий бирликлари давлат реестрини (кейинги ўринларда – Реестр) шакллантириш ва юритиш учун масъул орган ҳисобланади;

Кадастр агентлиги Реестрни ишлаб чиқиш ва ахборот тизимини қўллаб-қувватлашда буюртмачи ҳисобланади;

Ўзбекистон Республикасининг маъмурий-худудий тузилиши масалаларига доир ҳужжатларни, шу жумладан, хариталар ва чегаралар чизиғи тавсифини тайёрлаш, маъмурий-худудий бирликларнинг навбатчи хариталарини ва маъмурий-худудий бирликларнинг давлат реестрини ишлаб чиқиш ва юритиш ишлари Ўзбекистон Республикасининг Давлат бюджети параметрларида Кадастр агентлиги учун бюджетдан ажратиладиган маблағлар доирасида молиялаштирилади.

3. Шундай тартиб ўрнатилсинки, унга мувофиқ:

республика ва маҳаллий ижро этувчи ҳокимият органлари давлат хизматларини кўрсатишда ҳамда идоралараро электрон ўзаро ҳамкорлик қилишда Реестрдан фойдаланиши шарт;

республика ва маҳаллий ижро этувчи ҳокимият органлари раҳбарлари Реестрга киритиладиган ахборотнинг ўз вақтида тақдим этилиши ва ишончлилиги учун жавобгар ҳисобланади.

4. Кадастр агентлиги Ўзбекистон Республикаси Рақамли технологиялар вазирлиги билан биргаликда **икки ой муддатда** Реестрнинг ахборот тизимини ишлаб чиқиш ва жорий этиш бўйича техник топшириқ тасдиқланишини ҳамда **2025 йил 1 февралга қадар** Реестрнинг ахборот тизими тўлиқ ишга туширилишини таъминласин.

Бунда Реестрдан фойдаланиш орқали идоралараро ўзаро ҳамкорлик тизимини такомиллаштириш учун шарт-шароитлар яратилиши ҳамда маълумотларни реал вақт режимида фойдаланиш назарда тутилсин.

5. Ўзбекистон Республикаси Иқтисодиёт ва молия вазирлиги манфаатдор вазирликлар ва идоралар билан биргаликда ўзлари қабул қилган норматив-ҳуқуқий ҳужжатларни икки ой муддатда ушбу қарорга мувофиқлаштирсин.

6. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари А.Ж. Раматов ҳамда Ўзбекистон Республикаси Бош вазир ўринбосари – иқтисодиёт ва молия вазири Ж.А. Қўчқоров зиммасига юклансин.

Ўзбекистон Республикасининг  
Бош вазири



А. Арипов

**Ўзбекистон Республикасининг маъмурий-ҳудудий бирликлари  
давлат реестрини юритиш тартиби тўғрисида  
НИЗОМ**

**1-боб. Умумий қоидалар**

1. Мазкур Низом Ўзбекистон Республикасининг маъмурий-ҳудудий бирликлари давлат реестрини (кейинги ўринларда – Реестр) шакллантириш ва юритиш тартибини белгилайди.

2. Низомда қуйидаги асосий тушунчалар ва қисқартмадан фойдаланилади:

**маъмурий-ҳудудий бирликлар** – вилоятлар, туманлар, шаҳарлар, шаҳарчалар, қишлоқлар, овуллар, шунингдек, Қорақалпоғистон Республикаси;

**маъмурий-ҳудудий тузилиш масалалари** – маъмурий-ҳудудий бирликларни тузиш, тугатиш ва уларнинг чегараларини ўзгартириш, маъмурий-ҳудудий бирликларнинг маъмурий марказларини белгилаш ва кўчириш, маъмурий-ҳудудий бирликларнинг бўйсунувини ўзгартириш;

**маъмурий-ҳудудий объектни белгилаш тизим коди** (кейинги ўринларда – МҲОБТ коди) – маъмурий-ҳудудий бирлик мансублигини аниқлаш бўйича Ўзбекистон Республикаси Президенти ҳузуридаги Статистика агентлиги томонидан бериладиган код;

4. Маъмурий-ҳудудий бирликлар давлат рўйхатидан уларни Реестрга киритиш йўли билан ўтказилади.

Реестрга киритилган маъмурий-ҳудудий бирлик давлат рўйхатидан ўтказилган деб ҳисобланади.

5. Реестр давлат ер кадастрининг бир қисми ҳисобланади ҳамда Ўзбекистон Республикаси Иқтисодиёт ва молия вазирлиги ҳузуридаги Кадастр агентлиги (кейинги ўринларда – Кадастр агентлиги) томонидан юритилади.

6. Реестр ушбу Низомга 1-иловада келтирилган схемага мувофиқ давлат тилида электрон шаклда юритилади.

Қорақалпоғистон Республикаси ҳудуди бўйича маълумотлар қорақалпоқ ва давлат тилида киритилади.

7. Реестр қуйидаги маълумотларни ўз ичига олади:

маъмурий-ҳудудий бирликларнинг тоифалари ва номлари;

МҲОБТ коди;

маъмурий-ҳудудий бирликларнинг маъмурий марказлари;

маъмурий-ҳудудий бирликларнинг тавсифлари ва картографик чизмалари;

маъмурий-худудий бирликларни тузиш, тугатиш ва уларнинг чегараларини ўзгартириш, маъмурий-худудий бирликларнинг маъмурий марказларини белгилаш ва кўчириш, маъмурий-худудий бирликлар бўйсунувини ўзгартириш саналари;

маъмурий-худудий бирлик таркибига кирувчи маъмурий-худудий бирликларнинг МҲОБТ коди кўрсатилган рўйхати;

маъмурий-худудий бирликнинг муайян маъмурий-худудий бирлик таркибига мансублиги;

маъмурий-худудий бирликлар майдони ҳар йили 1 январь ҳолатига кўра тайёрланадиган Ер ресурсларининг ҳолати тўғрисидаги миллий ҳисобот асосида шакллантирилади;

маъмурий-худудий бирликлар худудида яшайдиган доимий аҳоли сони ҳамда МҲОБТ коди Ўзбекистон Республикаси Президенти ҳузуридаги Статистика агентлигининг (кейинги ўринларда – Статистика агентлиги) маълумотлари асосида киритилади.

Реестр ушбу Низомга 2-иловага мувофиқ шакллантирилади.

8. Давлат картография-геодезия фонди, давлат архивлари, Ўзбекистон Республикаси Олий Мажлиси палаталарининг архив маълумотлари ҳамда Кадастр агентлигининг ер ҳисоботи ва маъмурий-худудий бирликлари чегараларини белгилаш (тиклаш) бўйича бажарилган ишларнинг натижалари асосида бирламчи рўйхат ва ҳисобот ҳужжатлари шакллантирилади.

9. Ҳисобот ҳужжатлари худудий бирликнинг ҳар бир маъмурий-худудий бирлигига нисбатан шакллантирилади ва ушбу Низомнинг 7-бандида белгиланган маълумотларни тасдиқловчи ҳужжатларни ўз ичига олади.

## **2-боб. Реестрни юритиш тартиби**

### **10. Реестр:**

янги маъмурий-худудий бирликлар тўғрисидаги маълумотларни киритиш; маъмурий-худудий бирликлар тўғрисидаги маълумотларга ўзгартиришлар киритиш;

тугатиш ва маълумотлари ўзгартирилган маъмурий-худудий бирликлар тўғрисидаги маълумотларни архивлаш орқали юритилади.

11. Реестрни юритиш доирасида ўзгартириш ва қўшимчалар фақат Ўзбекистон Республикасининг маъмурий-худудий тузилиши масалалари бўйича қарор қабул қилишга ваколатли давлат органларининг қарорлари асосида киритилади.

12. Маъмурий-худудий тузилиш масалалари бўйича таклиф ёки илтимосномалар тақдим этган давлат органлари ваколатли давлат органлари томонидан ижобий қарор қабул қилинганидан кейин ўн иш кунида тегишли ҳужжатларни Реестрга киритиш учун Кадастр агентлигига ушбу Низомнинг 7-бандида белгиланган маълумотларни тасдиқловчи ҳужжатларни электрон ҳамкорлик орқали тақдим этиши шарт.

Янги маъмурий-худудий бирликларни тузиш ва айрим худудларни бир маъмурий-худудий бирликдан бошқасига ўтказиш пайтида янги тузилган ва тугатилган худудларга режалаштириш ҳамда картографик материаллар (электрон рақамли хариталар) масштаби ва тафсилотлари билан киритилади.

Бунда маъмурий-худудий бирликлар чегараларининг бурилиш нуқталари координаталарининг каталоглари ва улар орасидаги масофалар тўғрисидаги маълумотлар илова қилинган ҳолда, маъмурий чегараларни аниқ белгилаш имконини берадиган, шунингдек, маъмурий чегараларнинг чегара чизиқлари ва доимий аҳолининг аниқ сони тўғрисидаги маълумотлар киритилади.

13. Давлат органлари томонидан маъмурий-худудий тузилиш масалалари бўйича Кадастр агентлигига тақдим этилган ҳужжатлар уч иш кунда кўриб чиқилади ва тегишли маъмурий-худудий бирликларнинг хисобот ҳужжатлари тўпламига тикилади.

14. Тақдим этилган ҳужжатлар кўриб чиқилиши натижаси бўйича ушбу Низомнинг 12-банди талабларига мос келса, Кадастр агентлиги бир иш кунда МҲОБТ кодини белгилаш ёки аниқлик киритиш учун Статистика агентлигига юборади.

Статистика агентлиги маъмурий-худудий тузилиш масалалари бўйича тақдим этилган ҳужжатлар қабул қилинган кундан бошлаб икки иш кунда маъмурий-худудий бирликларнинг МҲОБТ кодини белгилайди ёки аниқлик киритади ва маълумотларни Кадастр агентлигига юборади.

Кадастр агентлиги Статистика агентлигидан маълумотлар қабул қилинган кундан бошлаб ўн иш кунда маълумотларни Реестрга киритади ҳамда бу ҳақда ваколатли давлат органини хабардор қилади.

15. Тақдим этилган ҳужжатлар кўриб чиқилиши натижаси бўйича ушбу Низомнинг 12-банди талабларига мос келмаса, Кадастр агентлиги бир иш кунда сабабларини кўрсатган ҳолда ҳужжатларни қайта кўриб чиқиш учун қайтаради.

Маъмурий-худудий тузилиш бўйича ҳужжатларни киритган давлат органлари ўн кун муддат ичида қайтарилган ҳужжатларнинг камчиликларини бартараф этиб, қайта киритади.

Қайта киритилган ҳужжатлар ушбу Низомнинг 13-бандига мувофиқ кўриб чиқилади.

16. Реестр Кадастр агентлигининг расмий веб-сайтида онлайн режимда жойлаштирилади.

Веб-сайтда маъмурий-худудий бирликлар сони тўғрисидаги маълумотлар ушбу Низомга 3-иловага мувофиқ шаклда худудлар кесимида жойлаштирилади.

17. Ушбу Низом кучга киргунига қадар шакллантирилган маъмурий-худудий бирликлар давлат рўйхатидан Кадастр агентлиги томонидан Давлат картография-геодезия фонди, давлат архивлари, Ўзбекистон Республикаси Олий Мажлиси палаталарининг архив маълумотлари, шунингдек, Кадастр агентлигининг сўровига асосан вазирлик ва идоралар ҳамда Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари томонидан тақдим этилган маъмурий-худудий бирликни шакллантириш учун асос бўлган ҳужжатлар асосида ўтказилади.

18. Реестрни шакллантириш ва юритиш Ўзбекистон Республикасининг Давлат бюджети маблағлари ва қонунчилик ҳужжатларида тақиқланмаган бошқа манбалар ҳисобидан молиялаштирилади.

### **3-боб. Яқунловчи қоидалар**

19. Ушбу Низомни қўллаш бўйича юзага келадиган низолар қонунчиликда белгиланган тартибда ҳал этилади.

20. Мазкур Низом талаблари бузилишида айбдор бўлган шахслар қонунчиликка мувофиқ жавоб берадилар.

Ўзбекистон Республикасининг маъмурий-худудий бирликлари давлат реестрини юритиш тартиби тўғрисидаги низомга  
1-илова

Ўзбекистон Республикасининг маъмурий-худудий бирликлари давлат реестрини юритиш  
СХЕМАСИ

Босқичлар	Масъуллар	Тадбирлар	Муддат
1-босқич	Вазирлар Маҳкамаси, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари	Маъмурий-худудий тузилиш масалалари бўйича қарор қабул қилинганидан кейин қарорга тегишли хужжатларни (Низомнинг 7-бандида белгиланган маълумотларни) Реестрга киритиш учун Кадастр агентлигига тақдим этади.	Ўн иш кунида
2-босқич	Кадастр агентлиги	1. Маъмурий-худудий тузилиш масалалари бўйича киритилган хужжатларни кўриб чиқади ва тегишли маъмурий-худудий бирликларнинг ҳисобот хужжатлари тўпламига киритади. 2. Тақдим этилган хужжатларда камчиликлар аниқланмаган тақдирда, маълумотларни Статистика агентлигига юборади. 3. Тақдим этилган хужжатлар белгиланган талабларга мос келмаган тақдирда, хужжатлар сабаблари кўрсатилган ҳолда қайта кўриб чиқиш учун қайтаради.	Уч иш куни
3-босқич	Статистика агентлиги	1. Маъмурий-худудий бирликларнинг МҲОБТ кодини белгилайди. 2. Маълумотларни Кадастр агентлигига юборади.	Икки иш кунида
4-босқич	Кадастр агентлиги	1. Маъмурий-худудий тузилиш масалалари бўйича тақдим этилган хужжатларни Реестрга киритади ҳамда бу ҳақда ваколатли давлат органини хабардор қилади. 2. Кадастр агентлигининг расмий веб-сайтида онлайн режимида жойлаштирилади.	Ўн иш кунида

Ўзбекистон Республикасининг маъмурий-худудий бирликлари давлат реестрини юритиш тартиби тўғрисидаги низомга  
2-илова

Ўзбекистон Республикасининг маъмурий-худудий бирликлари давлат РЕЕСТРИ

Т/р	МҲОБТ коди	Маъмурий-худудий бирлик номи	Маъмурий-худудий бирлик тифаси (мақоми)*	Маъмурий-худудий бирлик маъмурий маркази	Ташкил этилиши		Ўзгартирилиши		Тугатилиши		Таркибий мансублиги ***	Умумий майдони, га	Аҳолиси		Давлат рўйхатидан ўтказиш	
					санаси	қисқача тавсифи**	санаси	қисқача тавсифи**	санаси	қисқача тавсифи**			сони	рўйхатдан ўтган санаси	санаси	рақами
1	2	3	4	5	6	7	8	9	10	11	12	13	14	15	16	17

\* ) тифа тушунчаси маъмурий-худудий бирлик (пойтахт, вилоят маркази, туман маркази) мақоми ва бўйсунлишни англатади;  
 \*\* ) ташкил этилиши (ўзгартирилиши, тугатилиши) ҳақида қисқача тавсифда янги маъмурий-худудий бирликларнинг тузилиши, тугатилганлиги, марказининг белгиланганлиги, чегараларининг ўзгартирилиши, айрим ҳудудларнинг бир маъмурий-худудий бирликдан бошқасига ўтказилиши тўғрисида маълумотлар.  
 \*\*\* ) таркибий мансублигида – қайси маъмурий-худудий бирлик тарқибига киришини англатади.



Ўзбекистон Республикасининг маъмурий-худудий бирликлари давлат реестридан очик порталга жойлаштириладиган  
МАЪЛУМОТЛАР

Т/р	МХОБТ коди	Маъмурий-худудий бирлик номи	Маъмурий-худудий бирлик тоифаси (мақоми)*	Маъмурий-худудий бирлик маъмурий маркази	Умумий майдони, га	Аҳолиси		Ташкил этилиши		Ўзгартирилиши		Тугатилиши		Давлат рўйхатидан ўтказиши		Изох
						сон	рўйхатдан ўтган санаси	санаси	кискача тавсифи**	санаси	кискача тавсифи**	санаси	кискача тавсифи**	санаси	кискача тавсифи**	
1	2	3	4	5	6	7	8	9	10	11	12	13	14	15	16	17
1.			Республика													
...			бўйсунувдаги													
1.1.			Вилоят													
...			бўйсунувдаги													
1.1.1.			Туман													
...			бўйсунувдаги													

\*) гофа тушунчаси маъмурий-худудий бирлик (пойтахт, вилоят маркази, туман маркази) мақоми ва бўйсунушни англатади;  
\*\*) ўзгаришларнинг кискача мазмунда янги маъмурий-худудий бирликларнинг янги тузилиши ва айрим худудларни бир маъмурий-худудий бирликдан бошқасига ўтказилиши ва ўтказилган худудларнинг майдони тўғрисида маълумотлар.

**Ўзбекистон Республикасининг маъмурий-ҳудудий тузилиши  
масалалари бўйича республика комиссияси  
ТАРКИБИ**

1. А.Ж. Раматов – Ўзбекистон Республикаси Бош вазирининг ўринбосари, *комиссия раиси*
2. Ж.А. Қўчқоров – Ўзбекистон Республикаси Бош вазирининг ўринбосари – иқтисодиёт ва молия вазири, *комиссия раиси ўринбосари*
3. А.Д. Ташкулов – адлия вазири
4. Ш.С. Хидоятлов – қурилиш ва уй-жой коммунал хўжалиги вазири
5. Ж.Т. Мирзамахмудов – энергетика вазири
6. И.Р. Махкамов – транспорт вазири
7. И.Ю. Абдурахманов – қишлоқ хўжалиги вазири
8. Ш.Х. Шерматов – рақамли технологиялар вазири
9. А.А. Абдухақимов – экология, атроф-муҳитни муҳофаза қилиш ва иқлим ўзгариши вазири
10. Б.А. Бегалов – Ўзбекистон Республикаси Президенти ҳузуридаги Статистика агентлиги директори
11. И.И. Норқулов – иқтисодиёт ва молия вазирининг биринчи ўринбосари
12. Ф.Ж. Пулатов – Иқтисодиёт ва молия вазирлиги ҳузуридаги Кадастр агентлиги директори
13. Т.М. Абдуллаев – Иқтисодиёт ва молия вазирлиги ҳузуридаги Кадастр агентлиги директори ўринбосари, *комиссия котиби*

**Изоҳ.**

1. Комиссия аъзолари бошқа ишга ўтган тақдирда, унинг таркибига кўрсатилган лавозимларга янги тайинланган шахслар ёки зиммасига тегишли функцияларни бажариши юкланган шахслар киритилади.

2. Кўриб чиқиладиган масалалар мазмунига қараб, ушбу комиссия таркибига бошқа давлат органлари ва ташкилотлари, шунингдек, фуқаролик жамияти институтларининг вакиллари ҳам киритилиши мумкин.

**Ўзбекистон Республикасининг маъмурий-ҳудудий тузилиши  
масалалари бўйича ҳудудий комиссиянинг  
НАМУНАВИЙ ТАРКИБИ**

1. *Лавозимига кўра* – Қорақалпоғистон Республикаси Вазирлар Кенгаши Раиси, вилоятлар ва Тошкент шаҳар ҳокимлари, *комиссия раиси*
2. *Лавозимига кўра* – Қорақалпоғистон Республикаси Вазирлар Кенгаши Раиси, вилоятлар ва Тошкент шаҳар ҳокимларининг молия-иқтисодиёт ва камбағалликни қисқартириш масалалари бўйича биринчи ўринбосари - иқтисодиёт ва молия бош бошқармаси бошлиқлари, *комиссия раиси ўринбосари*
3. *Лавозимига кўра* – Қорақалпоғистон Республикаси Вазирлар Кенгаши Раиси, вилоятлар ва Тошкент шаҳар ҳокимларининг қурилиш, тўсиқларсиз муҳит яратиш, коммуникацияларни ривожлантириш, экология ва кўкаламзорлаштириш масалалари бўйича ўринбосарлари, *комиссия раиси ўринбосари*
4. *Лавозимига кўра* – Қорақалпоғистон Республикаси адлия вазири, вилоятлар ва Тошкент шаҳар адлия бошқармалари бошлиқлари
5. *Лавозимига кўра* – Қорақалпоғистон Республикаси Вазирлар Кенгаши Раиси, вилоятлар ва Тошкент шаҳар ҳокимларининг молия-иқтисодиёт ва камбағалликни қисқартириш масалалари бўйича биринчи ўринбосарлари - иқтисодиёт ва молия бош бошқармаси бошлиғининг биринчи ўринбосарлари
6. *Лавозимига кўра* – Қорақалпоғистон Республикаси қурилиш ва уй-жой коммунал хўжалиги вазири, вилоятлар ва Тошкент шаҳар қурилиш ва уй-жой коммунал хўжалиги бош бошқармалари бошлиқлари
7. *Лавозимига кўра* – Қорақалпоғистон Республикаси, вилоятлар ва Тошкент шаҳар статистика бошқармалари бошлиқлари
8. *Лавозимига кўра* – Кадастр агентлигининг Қорақалпоғистон Республикаси, вилоятлар ва Тошкент шаҳар бошқарма бошлиқлари
9. *Лавозимига кўра* – Кадастр агентлиги Давлат кадастрлари палатасининг Қорақалпоғистон Республикаси, вилоятлар ва Тошкент шаҳар бошқармалари бошлиқлари, *комиссия котиби*

**Изоҳ:**

1. *Комиссия аъзолари бошқа ишга ўтган тақдирда, унинг таркибига кўрсатилган лавозимларга янги тайинланган шахслар ёки зиммасига тегишли функцияларни бажариши юқланган шахслар киритилади.*

2. *Кўриб чиқиладиган масалалар мазмунига қараб, комиссия таркибига бошқа давлат органлари ва ташкилотлари, шунингдек, фуқоролик жамияти институтларининг вакиллари ҳам киритиши мумкин.*

**Ўзбекистон Республикасининг маъмурий-ҳудудий тузилиши  
масалалари бўйича республика комиссияси фаолиятини  
ташқил этиш тартиби тўғрисида  
НИЗОМ**

**1-боб. Умумий қоидалар**

1. Ушбу Низом Ўзбекистон Республикасининг маъмурий-ҳудудий тузилиши масалалари бўйича республика комиссиясининг (кейинги ўринларда – Республика комиссияси) мақоми, асосий вазифалари, функциялари, ҳуқуқ ва мажбуриятлари, шунингдек, унинг фаолиятини ташқил этиш, қайта тузиш ёки тугатиш тартибини белгилайди.

2. Республика комиссияси маъмурий-ҳудудий тузилиш масалалари юзасидан Ўзбекистон Республикаси Вазирлар Маҳкамасининг (кейинги ўринларда – Вазирлар Маҳкамаси) таклифларини ҳамда вилоятлар, Тошкент шаҳар, туманлар ва шаҳарлар ҳокимларининг илтимосномаларини кўриб чиқувчи ҳамда давлат экспертизасидан ўтказувчи идоралараро коллегиял орган ҳисобланади.

3. Республика комиссияси ўз фаолиятида Ўзбекистон Республикаси Конституцияси ва қонунларига, Ўзбекистон Республикаси Олий Мажлиси палаталарининг қарорларига, Ўзбекистон Республикаси Президентининг фармонлари, қарорлари ва фармойишларига, Вазирлар Маҳкамасининг қарорлари ва фармойишларига, шунингдек, ушбу Низомга амал қилади.

4. Республика комиссиясида маъмурий-ҳудудий тузилиш масалаларини кўриб чиқиш ва давлат экспертизасидан ўтказиш ушбу Низомга иловада келтирилган схемага мувофиқ амалга оширилади.

Республика комиссияси белгиланган намунадаги, ўз номи ёзилган бланкаларга эга бўлади ва Вазирлар Маҳкамасининг муҳридан фойдаланади.

**2-боб. Республика комиссиясининг асосий вазифалари**

5. Қуйидагилар Республика комиссиясининг асосий вазифалари ҳисобланади:

тегишли ҳудуднинг ижтимоий-иқтисодий ривожланиш даражасини ва демографик кўрсаткичларини ҳисобга олган ҳолда, маъмурий-ҳудудий тузилиш масалаларига доир таклифлар ва илтимосномаларни, шунингдек таклифлар ва илтимосномалар тегишли ҳудудларни комплекс ривожлантиришнинг истиқболли режаларига мувофиқлигини давлат экспертизасидан ўтказиш;

маъмурий-худудий тузилиш масалаларини ҳал қилишда ҳудуднинг ижтимоий-иқтисодий ривожланиш даражаси ҳисобга олиншини таъминлаш;

маъмурий-худудий тузилиш масалаларини ҳал қилишда хизмат мавқеини суиистеъмол қилиш ва бошқа ҳуқуқбузарликлар ҳолатларининг олдини олиш;

маъмурий-худудий тузилиш масалаларини кўриб чиқишда асоссиз қарорлар қабул қилинишига йўл қўймаслик.

### **3-боб. Республика комиссиясининг ҳуқуқлари ва жавобгарлиги**

6. Республика комиссияси ўзига юкланган вазифаларнинг бажарилишини таъминлаш учун қуйидаги ҳуқуқларга эга:

заруратга кўра республика ва маҳаллий ижро этувчи ҳокимият органлари ҳамда бошқа ташкилотлардан маъмурий-худудий тузилиш масалалари тўғрисидаги таклиф ёки илтимосномаларни атрофлича ўрганиш учун зарур бўлган маълумотларни белгиланган тартибда сўраш ва олиш;

республика ва маҳаллий ижро этувчи ҳокимият органлари ҳамда бошқа ташкилотлар мутахассисларини, шунингдек тегишли фаолият соҳаларида махсус билимларга эга бўлган бошқа шахсларни маъмурий-худудий тузилиш масалалари тўғрисидаги таклиф ва илтимосномаларни пухта ўрганиш учун жалб этиш;

ўз ваколатига кирувчи масалалар бўйича республика ва маҳаллий ижро этувчи ҳокимият органлари ҳамда ҳудудий комиссиялар раҳбарларининг ҳисоботларини эшитиш;

худудий комиссиялар қарорларининг қабул қилиниши ва ижро этилишининг мониторингини амалга ошириш ҳамда уларга аниқланган камчиликларни бартараф этиш бўйича ёзма кўрсатмалар киритиш;

маъмурий-худудий тузилиш масалаларини ҳал қилишда устувор равишда ҳудудларнинг яхлитлигини сақлаш ва анклав ҳудудларни қолдирмаслик чораларини кўриш.

7. Республика комиссияси ўзига юкланган вазифалар ва функциялар самарали бажарилишини таъминлайди.

### **4-боб. Республика комиссиясининг фаолиятини ташкил қилиш**

8. Республика комиссиясига унинг раиси ҳисобланадиган Ўзбекистон Республикаси Бош вазирининг ўринбосари раҳбарлик қилади.

9. Ўзбекистон Республикаси Иқтисодиёт ва молия вазирлиги ҳузуридаги Кадастр агентлиги Республика комиссиясининг ишчи органи (кейинги ўринларда – Ишчи орган) ҳисобланади.

10. Республика комиссияси ўзига юкланган вазифаларга мувофиқ куйидаги функцияларни бажаради:

маъмурий-худудий тузилиш масалалари бўйича келиб тушган таклифни ёки илтимосномани бир ой ичида кўриб чиқади ҳамда давлат экспертизасидан ўтказади;

заруратга кўра республика ва маҳаллий ижро этувчи ҳокимият органлари ҳамда бошқа ташкилотлардан маъмурий-худудий тузилиш масалалари тўғрисидаги таклиф ёки илтимосномаларни пухта ўрганиш учун зарур бўлган маълумотларни белгиланган тартибда олиш учун сўров юборади;

тегишли фаолият соҳаларида махсус билимларга эга бўлган мутахассисларни жалб этади;

ўз ваколатига кирувчи масалалар бўйича республика ва маҳаллий ижро этувчи ҳокимият органлари, худудий комиссиялар раҳбарларининг ҳисоботларини эшитади.

Республика комиссияси “Ўзбекистон Республикасининг Маъмурий-худудий тузилиши тўғрисида”ги Ўзбекистон Республикасининг Қонунига асосан ўтказилган экспертиза натижаси бўйича хулоса ижобий бўлганда, хулоса Вазирлар Маҳкамаси Раёсатида кўриб чиқилади ҳамда уни қарор қабул қилиш учун Ўзбекистон Республикаси Олий Мажлисига тақдим этади.

Республика комиссияси томонидан “Ўзбекистон Республикасининг Маъмурий-худудий тузилиши тўғрисида”ги Ўзбекистон Республикасининг Қонунига асосан ўтказилган экспертиза натижаси бўйича хулоса салбий бўлганда, тақдим этилган йиғма материаллар тўпламини маъмурий-худудий тузилиш масалалари бўйича таклиф ёки илтимоснома тайёрлаган давлат органига маромига етказиш учун қайтаради.

Республика комиссиясининг хулосасида маъмурий-худудий тузилиш масалаларига доир таклифларнинг ёки илтимосномаларнинг асосланганлиги таҳлили тегишли худуднинг ижтимоий-иқтисодий кўрсаткичларини, жорий ва истиқболдаги демографик кўрсаткичларни, шунингдек, комплекс ривожлантиришнинг истиқболли режаларини ҳисобга олган ҳолда акс эттирилиши керак.

11. Республика комиссиясининг раиси:

Республика комиссияси фаолиятига умумий раҳбарлик қилади ва унга юкланган вазифаларнинг бажарилишини таъминлайди;

Республика комиссияси аъзоларининг вазифаларини белгилайди ва уларга юкланган вазифалар бажарилишини мувофиқлаштиради;

Республика комиссиясининг иш режаларини, кўриб чиқиш учун тушган ҳужжатларни кўриб чиқиш жадвалларини тасдиқлайди;

Республика комиссияси мажлисларининг кун тартибини ва чақирилишини белгилайди;

Республика комиссияси томонидан қабул қилинган қарорларнинг бажарилиши юзасидан назоратни ташкил этади;

Республика комиссиясининг самарали ишлашини таъминлаш бўйича бошқа ишларни амалга оширади.

12. Республика комиссиясининг аъзолари:

Республика комиссияси мажлисларида кўриб чиқиладиган масалаларни муҳокама қилишда ва ҳал этишда иштирок этади;

Республика комиссиясига маъмурий-худудий тузилиш масалалари тўғрисидаги таклиф ёки илтимосномалар бўйича таклифлар киритади;

Республика комиссияси муҳокама қиладиган масалалар бўйича хулосалар тақдим этади.

Республика комиссияси аъзолари ўз фаолиятини жамоатчилик асосида амалга оширади ва тегишли давр мобайнида асосий иш жойидаги улар учун қонунчиликда белгиланган барча **шарт-шароитлар сақлаб қолинади.**

13. Ишчи орган:

Республика комиссиясининг навбатдаги мажлисига барча зарур ҳужжатларнинг ўз вақтида тайёрланишини таъминлайди;

кун тартибидаги масалалар бўйича Республика комиссиясининг мажлислари ўтказилишини ташкил этади;

мажлисларнинг ўтказиладиган вақти ва жойини, шунингдек, таклиф этиладиганлар контингентни Республика комиссиясининг раиси билан келишади;

Республика комиссиясининг аъзоларини ва таклиф этилган шахсларни мажлисларнинг ўтказиладиган санаси, вақти, жойи тўғрисида хабардор қилади;

Республика комиссияси қарорларининг бажарилиши мониторингини юритади ва унинг натижаларини Республика комиссиясига кўриб чиқиш учун тақдим этади;

Республика комиссиясининг хулосаларини расмийлаштиради ва тасдиқланган хулосаларни заруратга кўра Республика комиссиясининг аъзоларига ҳамда бошқа манфаатдор ташкилотларга юборади.

#### **5-боб. Республика комиссияси томонидан қарорлар қабул қилиш ва уларнинг бажарилишини ташкил этиш**

14. Республика комиссияси ўз ишини ўзи тасдиқлаган режалар асосида ташкил қилади ва мажлисларини заруратга кўра ҳар чоракда камида бир маротаба ўтказади. Комиссия раиси томонидан навбатдан ташқари мажлислар чақирилиши мумкин.

15. Республика комиссиясининг мажлисини унинг раиси, раис бўлмаган тақдирда, унинг ўринбосари олиб боради.

Республика комиссиясининг мажлиси аъзоларининг камида учдан икки қисми қатнашганда, ҳақиқий ҳисобланади.

Мажлисни ўтказиш учун кворум йиғилмаган тақдирда, Республика комиссиясининг янги мажлиси ўтказиладиган сана эълон қилинади.

16. Республика комиссиясининг мажлисига кўриб чиқиладиган масалаларнинг хусусиятига қараб, республика ижро этувчи ҳокимият органлари, хўжалик бирлашмалари ва бошқа ташкилотларнинг раҳбарлари ҳамда мутахассислари таклиф этилиши мумкин.

17. Республика комиссияси қарорларни тезкор қабул қилиш мақсадида Республика комиссиясининг қарорларини унинг аъзолари билан ўз ваколатлари доирасида сўров ўтказиш орқали тасдиқлаши мумкин.

18. Республика комиссияси хулосасининг асл нусхаси ва унга тегишли материаллар Вазирлар Маҳкамасига тақдим этилади.

19. Республика комиссияси қабул қилинган қарорларнинг бажарилишини мунтазам равишда ўз мажлисларида кўриб чиқади.

#### **6-боб. Республика комиссиясида маъмурий-худудий тузилиш масалаларини кўриб чиқиш ва давлат экспертизасидан ўтказиш тартиби**

20. Ўзбекистон Республикасининг маъмурий-худудий тузилиши масалаларига доир илтимосномалар вилоятлар ва Тошкент шаҳар ҳокимликлари томонидан Вазирлар Маҳкамасига киритилади.

21. Вазирлар Маҳкамаси ўттиз кун муддатда маъмурий-худудий тузилиш масалалари бўйича киритилган илтимосномани ишчи орган билан биргаликда кўриб чиқади, Республика комиссиясига давлат экспертизасидан ўтказиш учун киритади ва Республика комиссиясининг хулосасига кўра илтимосномани маъқуллайди ёки рад этади.

Бунда Республика комиссияси томонидан маъмурий-худудий тузилиш масалалари бўйича келиб тушган таклиф давлат экспертизасидан ўтказилади, натижаси юзасидан хулоса қабул қилинади ва Вазирлар Маҳкамасига тақдим этилади.

Таклиф ва илтимосномаларда келтирилган маълумотларни кўшимча ўрганиш талаб этилган ҳолларда, Республика комиссияси давлат экспертизасини бир ойдан кўп бўлмаган муддатга узайтириши мумкин.

22. Маъмурий-худудий тузилиши масалаларига доир таклифга Республика комиссияси томонидан ижобий хулоса тақдим этилган тақдирда, Вазирлар Маҳкамаси илтимосномани маъқуллайди ва маъқулланган таклифни ўн кун муддатда Ўзбекистон Республикаси Олий Мажлисига кўриб чиқиш учун киритади.



Маъмурий-ҳудудий тузилиши масалаларига доир таклифга Республика комиссияси томонидан салбий хулоса тақдим этилганда, Вазирлар Маҳкамаси тақдим этилган материалларни маъмурий-ҳудудий тузилиш масалалари бўйича илтимоснома тайёрлаган давлат органига маромига етказиш учун қайтаради.

#### **7-боб. Яқунловчи қоида**

23. Республика комиссияси қонунчилик ҳужжатларида белгиланган тартибда Вазирлар Маҳкамаси томонидан тугатилади ёки қайта тузилади.

Ўзбекистон Республикасининг маъмурий-худудий  
тузилиши масалалари бўйича республика  
комиссияси тўғрисидаги низомга  
илова

Республика комиссиясида маъмурий-худудий тузилиш масалаларини  
кўриб чиқиш ҳамда давлат экспертизасидан ўтказиш  
СХЕМАСИ

Босқичлар	Субъектлар	Тадбирлар	Бажариш муддатлари
1-босқич	Вилоятлар ва Тошкент шаҳар ҳокимликлари	Маъмурий-худудий тузилиш масалалари бўйича илтимосномаларни Вазирлар Маҳкамасига киритади.	Заруратга кўра
2-босқич	Вазирлар Маҳкамаси	<p>1. Киритилган илтимосномани ишчи орган билан биргаликда кўриб чиқади.</p> <p>2. Республика комиссиясига маъмурий-худудий тузилиш масалаларига доир таклифларни давлат экспертизасидан ўтказиш учун киритади.</p> <p>3. Республика комиссияси: маъмурий-худудий тузилиш масалаларига доир таклифлар давлат экспертизасидан ўтказади; давлат экспертизаси натижаси юзасидан хулоса қабул қилади.</p> <p>4. Республика комиссиясининг давлат экспертизаси хулосасига кўра илтимосномани маъқуллайди ёки рад этади.</p>	Ўттиз кун муддатда (алоҳида ҳолларда бир ойдан кўп бўлмаган муддатга узайтирилади)
3-босқич	Вазирлар Маҳкамаси	<p>1. Республика комиссияси томонидан ижобий хулоса тақдим этилган тақдирда, илтимосномани маъқуллайди ва маъқулланган таклифни Ўзбекистон Республикаси Олий Мажлисига кўриб чиқиш учун киритади.</p> <p>2. Республика комиссияси томонидан салбий хулоса тақдим этилганда, Вазирлар Маҳкамаси тақдим этилган йиғма материаллар тўпламини илтимоснома тайёрлаган давлат органига маромига етказиш учун қайтаради.</p>	Ўн кун муддатда (заруратга кўра)

**Ўзбекистон Республикасининг маъмурий-ҳудудий  
тузилиши масалалари бўйича ҳудудий комиссиялар тўғрисида  
НАМУНАВИЙ НИЗОМ**

**1-боб. Умумий қоидалар**

1. Ушбу Низом Ўзбекистон Республикасининг маъмурий-ҳудудий тузилиши масалалари бўйича Қорақалпоғистон Республикаси, вилоятлар, туманлар ва шаҳарлар комиссияларининг (кейинги ўринларда – ҳудудий комиссиялар) асосий вазифалари, функциялари, ҳуқуқ ва мажбуриятлари, шунингдек, унинг фаолиятини ташкил этиш, қайта тузиш ёки тугатиш тартибини белгилайди.

2. Ҳудудий комиссиялар маъмурий-ҳудудий тузилиш масалалари юзасидан Қорақалпоғистон Республикаси Вазирлар Кенгашининг, вилоятлар, Тошкент шаҳар, туман ва шаҳар ҳокимларининг таклифларини ва илтимосномаларини кўриб чиқувчи ҳамда давлат экспертизасидан ўтказувчи идоралараро коллегиял орган ҳисобланади.

3. Ҳудудий комиссиялар ўз фаолиятида Ўзбекистон Республикаси Конституцияси ва қонунларига, Ўзбекистон Республикаси Олий Мажлиси палаталарининг қарорларига, Ўзбекистон Республикаси Президентининг фармонлари, қарорлари ва фармойишларига, Ўзбекистон Республикаси Вазирлар Маҳкамасининг қарорлари ва фармойишларига, шунингдек, ушбу Низомга амал қиладилар.

4. Ҳудудий комиссиялар Қорақалпоғистон Республикаси Вазирлар Кенгаши, вилоятлар, Тошкент шаҳар, туманлар ва шаҳарлар ҳокимликлари томонидан “Ўзбекистон Республикасининг Маъмурий-ҳудудий тузилиши тўғрисида”ги Ўзбекистон Республикасининг Қонунида белгиланган таркибда ташкил этилади.

5. Ҳудудий комиссияларда маъмурий-ҳудудий тузилиш масалаларини кўриб чиқиш ва экспертизадан ўтказиш ушбу Низомга 1 ва 2-иловаларда келтирилган схемага мувофиқ амалга оширилади.

Ҳудудий комиссиялар белгиланган намунадаги, ўз номи ёзилган бланкаларга эга бўладилар ва тегишли равишда Қорақалпоғистон Республикаси Вазирлар Кенгаши, вилоятлар, туманлар, шаҳарлар ҳокимликларининг муҳридан фойдаланадилар.

## **2-боб. Худудий комиссияларнинг асосий вазифалари, ҳуқуқлари ва жавобгарлиги**

6. Куйидагилар худудий комиссияларнинг асосий вазифалари ҳисобланади:  
худуднинг ижтимоий-иқтисодий ривожланиш даражасини ва демографик кўрсаткичларини ҳисобга олган ҳолда, маъмурий-худудий тузилиш масалаларига доир таклиф ва илтимосномаларни, шунингдек, таклиф ва илтимосномаларнинг тегишли худудларни комплекс ривожлантиришнинг истиқболли режаларига мувофиқлигини экспертизадан ўтказиш;

маъмурий-худудий тузилиш масалаларини ҳал қилишда худуднинг ижтимоий-иқтисодий ривожланиш даражаси ҳисобга олинишини таъминлаш;

маъмурий-худудий тузилиш масалаларини ҳал этишда хизмат мавқеини суиистеъмол қилиш ва бошқа ҳуқуқбузарликлар ҳолатларининг олдини олиш;

маъмурий-худудий тузилиш масалаларини кўриб чиқишда асосиз қарорлар қабул қилинишига йўл қўймаслик.

7. Худудий комиссиялар ўзларига юкланган вазифаларнинг ижро этилишини таъминлаш учун куйидаги ҳуқуқларга эга:

Заруратга кўра республика ва маҳаллий давлат ҳокимияти органларидан ҳамда бошқа ташкилотлардан маъмурий-худудий тузилиши тўғрисидаги таклифларни атрофлича ўрганиш учун зарур бўлган маълумотларни белгиланган тартибда сўраш ва олиш;

республика ва маҳаллий ижро этувчи ҳокимият органлари ҳамда бошқа ташкилотлар мутахассисларини, шунингдек, тегишли фаолият соҳаларида махсус билимларга эга бўлган бошқа шахсларни маъмурий-худудий тузилиш масалалари тўғрисидаги таклиф ва илтимосномаларни пухта ўрганиш учун жалб этиш;

ўз ваколатига кирувчи масалалар бўйича маҳаллий ижро этувчи ҳокимият органлари, худудий комиссиялар раҳбарлари ва давлат бошқаруви органларининг худудий бўлинмалари ҳисоботларини эшитиш.

8. Худудий комиссиялар ўзларига юкланган вазифалар ва функцияларнинг самарали бажарилиши учун жавоб берадилар.

Худудий комиссиялар ўз фаолияти тўғрисида ҳар йили тегишлича Қорақалпоғистон Республикаси Жўқорғи Кенгеси, халқ депутатлари вилоят, Тошкент шаҳар, туман ва шаҳар Кенгашларига ҳисобот берадилар.

Қорақалпоғистон Республикаси, вилоятлар ва Тошкент шаҳар комиссиялари ҳар чоракда ўз фаолияти тўғрисида Ўзбекистон Республикасининг маъмурий-худудий тузилиш масалалари бўйича Республика комиссиясига ахборот тақдим этадилар.

Туманлар ва шаҳарлар комиссиялари ҳар чоракда ўз фаолияти тўғрисида тегишлича маъмурий-худудий тузилиш масалалари бўйича Қорақалпоғистон Республикаси, вилоятлар ва Тошкент шаҳар комиссияларига ахборот тақдим этадилар.

### 3-боб. Худудий комиссияларнинг фаолиятини ташкил қилиш

9. Худудий комиссияга унинг раиси ҳисобланадиган Қорақалпоғистон Республикаси Вазирлар Кенгашининг Раиси, вилоят, Тошкент шаҳар, туман ва шаҳар ҳокими раҳбарлик қилади.

10. Ўзбекистон Республикаси Иқтисодиёт ва молия вазирлиги ҳузуридаги Кадастр агентлиги Давлат кадастрлари палатасининг Қорақалпоғистон Республикаси, вилоятлар ва Тошкент шаҳар бошқармаси ва уларнинг туман ва шаҳар филиаллари тегишинча худудий комиссияларнинг ишчи органлари (кейинги ўринларда – Ишчи орган) ҳисобланади.

#### 11. Худудий комиссиялар:

маъмурий-худудий тузилиш масалалари бўйича келиб тушган таклиф ва илтимосномани бир ой ичида кўриб чиқади ҳамда худуднинг ижтимоий-иқтисодий ривожланиш даражасини ва демографик кўрсаткичларини ҳисобга олган ҳолда экспертизадан ўтказди.

маъмурий-худудий тузилиш масалаларига доир таклиф ва илтимосномаларнинг асослантирилганлиги таҳлили тегишли худуднинг ижтимоий-иқтисодий кўрсаткичларини, жорий ва истиқболдаги демографик кўрсаткичларини, шунингдек, комплекс ривожлантиришнинг истиқболли режалари ҳисобга олинганлигини аниқлайди.

давлат экспертизаси натижаси бўйича хулоса ижобий бўлганда, хулосани тегишинча Қорақалпоғистон Республикаси Вазирлар Кенгаши, вилоятлар, Тошкент шаҳар, туман ва шаҳар ҳокимликларига тақдим этади.

давлат экспертизаси натижаси бўйича хулоса салбий бўлганда, маъмурий-худудий тузилиш масалалари бўйича таклиф ва илтимосномани тайёрлаган Қорақалпоғистон Республикаси Вазирлар Кенгаши, вилоятлар, Тошкент шаҳар, туман ва шаҳар ҳокимликларига маромига етказиш учун қайтаради.

#### 12. Худудий комиссия раиси:

худудий комиссия фаолиятига умумий раҳбарлик қилади ва унга юкланган вазифаларнинг бажарилишини таъминлайди;

худудий комиссия аъзоларининг вазифаларини белгилайди ва уларга юкланган вазифаларни бажариш ишларини мувофиқлаштиради;

худудий комиссиянинг иш режаларини, тушган ҳужжатларни кўриб чиқиш жадвалларини тасдиқлайди;

худудий комиссия мажлисларининг кун тартибини ва чақирилишини белгилайди;

худудий комиссия томонидан қабул қилинган қарорларнинг бажарилиши юзасидан назоратни ташкил этади;

худудий комиссиянинг самарали ишлаштини таъминлаш бўйича бошқа ишларни амалга оширади.

### 13. Худудий комиссиянинг аъзолари:

худудий комиссия мажлисларида кўриб чиқиладиган масалаларни муҳокама қилишда ва ҳал этишда иштирок этади;

худудий комиссияга маъмурий-худудий тузилишининг долзарб масалалари бўйича таклифлар киритади;

худудий комиссия томонидан муҳокама қилинадиган масалалар бўйича хулосалар тақдим этади.

Худудий комиссия аъзолари ўз фаолиятини жамоатчилик асосида амалга оширади ва тегишли давр мобайнида асосий иш жойидаги улар учун қонунчиликда белгиланган барча шарт-шароитлар сақлаб қолинади.

### 14. Ишчи орган:

худудий комиссиянинг навбатдаги мажлисига барча зарур ҳужжатларнинг ўз вақтида тайёрланишини таъминлайди;

кун тартибидаги масалалар бўйича худудий комиссиянинг мажлислари ўтказилишини ташкил этади;

мажлисларнинг ўтказиладиган санаси, вақти ва жойини, шунингдек, таклиф этиладиганлар контингентини худудий комиссия раиси билан келишади;

худудий комиссия аъзоларини ва таклиф этилган шахсларни мажлиснинг ўтказиладиган санаси, вақти, жойи тўғрисида хабардор қилади;

худудий комиссия қарорларининг бажарилиши мониторингини юритади ва унинг натижаларини комиссия мажлисида кўриб чиқиш учун тақдим қилади;

худудий комиссиянинг хулосасини расмийлаштиради ва тасдиқланган хулосаларни заруратга кўра худудий комиссиянинг аъзоларига ҳамда бошқа манфаатдор ташкилотларга жўнатади.

15. Худудий комиссия ўз ишини ўзи тасдиқлаган режалар асосида ташкил қилади ва ўз мажлисларини заруратга кўра ҳар чоракда камида бир маротаба ўтказиши мумкин. Комиссия раиси томонидан навбатдан ташқари мажлислар чақирилиши мумкин.

16. Худудий комиссиянинг мажлисини унинг раиси, раис бўлмаган тақдирда унинг ўринбосари олиб боради.

Худудий комиссиянинг мажлиси ўз аъзоларининг камида учдан икки қисми қатнашганда қонуний ҳисобланади.

Мажлисни ўтказиш учун кворум йиғилмаган тақдирда, худудий комиссиянинг янги мажлиси ўтказиладиган сана эълон қилинади.

17. Худудий комиссиянинг мажлисига кўриб чиқиладиган масалаларнинг хусусиятига қараб, республика ижро этувчи ҳокимият органлари, хўжалик бирлашмалари, бошқа ташкилотларнинг раҳбарлари ҳамда мутахассислари таклиф этилиши мумкин.

#### **4-боб. Худудий комиссия томонидан қарорлар қабул қилиш ва уларнинг бажарилишини ташкил этиш**

18. Худудий комиссия қарорларни тезкор қабул қилиш мақсадида худудий комиссиянинг қарорларини унинг аъзолари билан ўз ваколатлари доирасида сўров ўтказиш орқали тасдиқлаши мумкин.

19. Худудий комиссия хулосасининг асл нусхаси ва унга тегишли материаллар тегишлича Қорақалпоғистон Республикаси Вазирлар Кенгаши, вилоятлар, туманлар, шаҳарлар ҳокимликларига юборилади.

20. Худудий комиссия қабул қилинган қарорларнинг бажарилишини мунтазам равишда ўз мажлисларида кўриб чиқади.

#### **5-боб. Худудий комиссияда маъмурий-худудий тузилиш масалаларини кўриб чиқиш ва экспертизадан ўтказиш тартиби**

21. Тегишли вилоят ва Тошкент шаҳар ҳокимликлари томонидан маъмурий-худудий тузилиш масалалари бўйича қуйидаги таклифлар тайёрланади ва худудий комиссияга давлат экспертизасидан ўтказиш учун киритилади:

вилоят ва туман бўйсунувидаги шаҳарларни, вилоятлар туманларини, Тошкент шаҳар туманларини ва вилоят бўйсунувидаги шаҳарлар туманларини тузиш ҳамда тугатиш, уларнинг чегараларини ўзгартириш;

вилоятларнинг маъмурий марказларини белгилаш ва кўчириш;

шаҳарларни вилоят ва шаҳарчаларни туман бўйсунувидаги шаҳарлар тоифасига киритиш.

Худудий комиссия томонидан маъмурий-худудий тузилиш масалалари бўйича келиб тушган таклиф экспертизадан ўтказилади, натижаси юзасидан хулоса қабул қилиниб, вилоятлар ва Тошкент шаҳар ҳокимига тақдим этилади.

Таклиф ва илтимосномаларда келтирилган маълумотларни қўшимча ўрганиш талаб этилган ҳолларда, худудий комиссия экспертизани бир ойдан кўп бўлмаган муддатга узайтириши мумкин.

Вилоятлар ва Тошкент шаҳар ҳокими ўн кун муддатда маъқулланган хулоса ва тегишли ҳужжатларни вилоятлар ва Тошкент шаҳар халқ депутатлари Кенгашига кўриб чиқиш учун киритади.

Вилоятлар ва Тошкент шаҳар халқ депутатлари Кенгаши киритилган таклифни кўриб чиқади ва натижаси юзасидан қарор қабул қилади. Қабул қилинган қарор вилоятлар ва Тошкент шаҳар ҳокимлигига тақдим этилади.

Вилоятлар ва Тошкент шаҳар ҳокимлари Вазирлар Маҳкамасига ўн кун муддатда маъмурий-худудий тузилиш масалаларига оид илтимосномани, вилоятлар ва Тошкент шаҳар халқ депутатлари Кенгаши қарорини, худудий комиссиянинг хулосаси ва бошқа тегишли ҳужжатларни тақдим этади.

22. Қорақалпоғистон Республикаси Вазирлар Кенгаши томонидан маъмурий-худудий тузилиши масалалари бўйича қуйидаги таклифлар тайёрланади ва худудий комиссияга давлат экспертизасидан ўтказиш учун киритилади:

Қорақалпоғистон Республикасининг пойтахтини белгилаш ва кўчириш;

Қорақалпоғистон Республикасида туманларни, Қорақалпоғистон Республикаси бўйсунувидаги шаҳарларни ва шаҳарларда туманларни тузиш ҳамда тугатиш;

Қорақалпоғистон Республикасининг туман бўйсунувидаги шаҳарларини Қорақалпоғистон Республикаси бўйсунувидаги шаҳарлар тоифасига киритиш.

Худудий комиссия томонидан маъмурий-худудий тузилиш масалалари бўйича келиб тушган таклиф экспертизадан ўтказилади, натижаси юзасидан хулоса қабул қилиниб, Қорақалпоғистон Республикаси Вазирлар Кенгашига тақдим этилади.

Таклиф ва илтимосномаларда келтирилган маълумотларни қўшимча ўрганиш талаб этилган ҳолларда, худудий комиссия давлат экспертизасини бир ойдан кўп бўлмаган муддатга узайтириши мумкин.

Қорақалпоғистон Республикаси Вазирлар Кенгаши Қорақалпоғистон Республикаси Жўқорғи Кенгесига ўн кун муддатда маъмурий-худудий тузилиш масалаларига оид таклифни, худудий комиссиянинг хулосаси ва бошқа тегишли ҳужжатларни тақдим этади.

23. Қорақалпоғистон Республикаси туман ҳокимликлари томонидан маъмурий-худудий тузилиши масалалари бўйича қуйидаги таклифлар тайёрланади ва худудий комиссияга давлат экспертизасидан ўтказиш учун киритилади:

шаҳарчаларни, қишлоқларни ва овулларни тузиш ҳамда тугатиш ва уларнинг чегараларини ўзгартириш;

вилоят туманларининг маъмурий марказларини белгилаш ва кўчириш; қишлоқлар ва овулларни шаҳарчалар тоифасига киритиш.

Худудий комиссия томонидан маъмурий-худудий тузилиш масалалари бўйича келиб тушган таклиф экспертизадан ўтказилади, натижаси юзасидан хулоса қабул қилиниб, туман ҳокимлигига тақдим этилади.

Таклиф ва илтимосномаларда келтирилган маълумотларни қўшимча ўрганиш талаб этилган ҳолларда, худудий комиссия давлат экспертизаси бир ойдан кўп бўлмаган муддатга узайтириши мумкин.

Туман ҳокими ўн кун муддатда маъқулланган хулоса ва тегишли ҳужжатларни туман халқ депутатлари Кенгашига кўриб чиқиш учун киритади.

Туман халқ депутатлари Кенгаши киритилган таклифни кўриб чиқади ва натижаси юзасидан қарор қабул қилади. Қабул қилинган қарор туман, шаҳар ҳокимлигига тақдим этилади.



Туман ҳокими халқ депутатлари вилоят Кенгашига ўн кун муддатда маъмурий-худудий тузилиш масалаларига оид илтимосномани, туман халқ депутатлари Кенгаши қарорини, туман худудий комиссиясининг хулосаси ва бошқа тегишли ҳужжатларни тақдим этади.

Халқ депутатлари вилоят Кенгаши тегишли туман ҳокимининг илтимосномасини илтимоснома келиб тушганидан кейин ўттиз кун ичида кўриб чиқади ва уни маъқуллаш ёки рад этиш тўғрисида қарор қабул қилади.

24. Қорақалпоғистон Республикасида туман ва шаҳар ҳокимликлари томонидан маъмурий-худудий тузилиши масалалари бўйича тегишинча қуйидаги таклифлар тайёрланади ва худудий комиссияга давлат экспертизасидан ўтказиш учун киритилади:

Қорақалпоғистон Республикасида туман бўйсунувидаги шаҳарларни, шаҳарчаларни, қишлоқларни ва овулларни тузиш ҳамда тугатиш ва уларнинг чегараларини ўзгартириш;

Қорақалпоғистон Республикасида туманларнинг маъмурий марказларини белгилаш ва кўчириш;

Қорақалпоғистон Республикасининг қишлоқлари ва овулларини шаҳарчалар тоифасига киритиш.

Қорақалпоғистон Республикасида туманларнинг, Қорақалпоғистон Республикаси бўйсунувидаги шаҳарларнинг ва шаҳарларда туманларнинг чегараларини ўзгартириш;

Қорақалпоғистон Республикасида туман бўйсунувидаги шаҳарлар, шаҳарчалар, қишлоқлар ва овулларнинг чегараларини ўзгартириш;

Қорақалпоғистон Республикасининг шаҳарчаларини туман бўйсунувидаги шаҳарлар тоифасига киритиш;

Худудий комиссия томонидан маъмурий-худудий тузилиш масалалари бўйича келиб тушган таклиф экспертизадан ўтказилади, натижаси юзасидан хулоса қабул қилиниб, туман ҳокимлигига тақдим этилади.

Таклиф ва илтимосномаларда келтирилган маълумотларни қўшимча ўрганиш талаб этилган ҳолларда, худудий комиссия экспертизани бир ойдан кўп бўлмаган муддатга узайтириши мумкин.

Туман ҳокими ўн кун муддатда маъқулланган хулоса ва тегишли ҳужжатларни туман халқ депутатлари Кенгашига кўриб чиқиш учун киритади.

Туман халқ депутатлари Кенгаши киритилган таклифни кўриб чиқади ва натижаси юзасидан қарор қабул қилади. Қабул қилинган қарор туман, шаҳар ҳокимлигига тақдим этилади.

Туман ҳокими Қорақалпоғистон Республикаси Вазирлар Кенгашига ўн кун муддатда маъмурий-худудий тузилиш масалаларига оид илтимосномани, туман халқ депутатлари Кенгаши қарорини, туман худудий комиссиясининг хулосаси ва бошқа тегишли ҳужжатларни тақдим этади.

Қорақалпоғистон Республикаси Вазирлар Кенгаши тегишли туман ҳокимининг илтимосномаси келиб тушган санадан бошлаб ўттиз кун ичида кўриб чиқади ва уни маъқуллаш ёки рад этиш тўғрисида қарор қабул қилади.

Илтимоснома маъқулланган тақдирда, Қорақалпоғистон Республикаси Вазирлар Кенгаши ўн кун ичида таклиф тайёрлайди ҳамда маъмурий-ҳудудий тузилиш масалаларига оид илтимосномани, туман халқ депутатлари Кенгаши қарорини, туман ҳудудий комиссиясининг хулосасини бошқа тегишли ҳужжатлар билан бирга Қорақалпоғистон Республикаси Жўқорғи Кенгесига кўриб чиқиш учун киритади.

Қорақалпоғистон Республикаси Жўқорғи Кенгеси Раиси Қорақалпоғистон Республикаси Вазирлар Кенгашининг таклифини кўриб чиқади ва натижаси юзасидан тегишли қарор қабул қилади.

25. Маъмурий-ҳудудий тузилиши масалаларига доир таклиф ва илтимосномалар кўриб чиқилиб, хулоса берувчилар томонидан салбий хулоса тақдим этилган тақдирда, тақдим этилган йиғма материаллар тўпламини тегишинча маъмурий-ҳудудий тузилиш масалалари бўйича таклиф ёки илтимоснома тайёрлаган Қорақалпоғистон Республикаси Вазирлар Кенгаши, вилоят, Тошкент шаҳар, туман, шаҳар ҳокимлигига маромига етказиш учун қайтарилади.

#### **6-боб. Яқунловчи қоида**

26. Ҳудудий комиссияни тугатиш ёки қайта тузиш қонунчилик ҳужжатларида белгиланган тартибда амалга оширилади.

Ўзбекистон Республикасининг маъмурий-  
худудий тузилиши масалалари бўйича  
худудий комиссиялар тўғрисидаги  
намунавий низомга  
1-илова

**Вилоятлар ва Тошкент шаҳар ҳокимликлари худудий  
комиссиясида маъмурий-худудий тузилиш масалаларини кўриб  
чиқиш экспертизадан ўтказиш  
СХЕМАСИ**

Босқичлар	Субъектлар	Тадбирлар	Бажариш муддатлари
<b>Вилоятлар ва Тошкент шаҳар ҳокимликлари томонидан кўриб чиқиладиган маъмурий-худудий тузилиш масалалари</b>			
1-босқич	Вилоятлар ва Тошкент шаҳар ҳокимлиги	Маъмурий-худудий тузилиш масалаларига оид таклифларни худудий комиссияга давлат экспертизасидан ўтказиш учун киритади.	Заруратга кўра
2-босқич	Худудий комиссия	Экспертизадан ўтказди, натижаси юзасидан хулоса қабул қилиб, тегишли вилоятлар ва Тошкент шаҳар ҳокимлигига тақдим этади.	Ўттиз кун муддатда (алоҳида ҳолларда бир ойдан кўп бўлмаган муддатга узайтирилади)
3-босқич	Вилоятлар ва Тошкент шаҳар ҳокимлиги	Маъқулланган хулоса ва тегишли хужжатларни халқ депутатлари вилоятлар ва Тошкент шаҳар Кенгашига кўриб чиқиш учун киритади.	Ўн кун муддатда
4-босқич	Халқ депутатлари вилоятлар ва Тошкент шаҳар Кенгаши	Киритилган таклифни кўриб чиқади ва натижаси юзасидан қарор қабул қилади. Қабул қилинган қарорни вилоятлар ва Тошкент шаҳар ҳокимлигига тақдим этади.	Регламент асосида
5-босқич	Вилоятлар ва Тошкент шаҳар ҳокимлиги	Маъмурий-худудий тузилиш масалаларига оид илтимосномани, халқ депутатлари вилоятлар ва Тошкент шаҳар Кенгаши қарорини, худудий комиссиянинг хулосаси ва бошқа тегишли хужжатларни Вазирлар Маҳкамасига тақдим этади.	Ўн кун муддатда
<b>Туман (шаҳар) ҳокимликлари томонидан киритиладиган маъмурий-худудий тузилиши масалалари</b>			
1-босқич	Туман (шаҳар) ҳокимлиги	Маъмурий-худудий тузилиш масалаларига оид таклифларни худудий комиссияга давлат экспертизасидан ўтказиш учун киритади.	Заруратга кўра
2-босқич	Худудий комиссия	Экспертизадан ўтказди, натижаси юзасидан хулоса қабул қилиб, туман (шаҳар) ҳокимлигига тақдим этади.	Регламент асосида (алоҳида ҳолларда бир ойдан кўп бўлмаган муддатга узайтирилади)

Босқичлар	Субъектлар	Тадбирлар	Бажариш муддатлари
3-босқич	Туман (шаҳар) ҳокимлиги	Маъқулланган хулоса ва тегишли хужжатларни халқ депутатлари туман (шаҳар) Кенгашига кўриб чиқиш учун киритади.	Ўн кун муддатда
4-босқич	халқ депутатлари туман (шаҳар) Кенгаши	Киритилган таклифни кўриб чиқади ва натижаси юзасидан қарор қабул қилади. Қабул қилинган қарорни туман ҳокимлигига тақдим этади.	Регламент асосида
5-босқич	Туман (шаҳар) ҳокимлиги	Маъмурий-ҳудудий тузилиш масалаларига оид илтимосномани, халқ депутатлари туман (шаҳар) Кенгаши қарорини, туман ҳудудий комиссиясининг хулосаси ва бошқа тегишли хужжатларни халқ депутатлари вилоят, Тошкент шаҳар Кенгашига кўриб чиқиш учун киритади.	Ўн кун муддатда
6-босқич	Халқ депутатлари вилоят Кенгаши	Тегшли туман (шаҳар) ҳокимининг илтимосномасини кўриб чиқади ва уни маъқуллаш ёки рад этиш тўғрисида қарор қабул қилади.	Ўттиз кун муддатда

Ўзбекистон Республикасининг маъмурий-  
худудий тузилиши масалалари бўйича  
худудий комиссиялар тўғрисидаги  
намунавий низомга  
2-илова

**Қорақалпоғистон Республикаси худудий комиссиясида  
маъмурий-худудий тузилиш масалаларини кўриб  
чиқиш ҳамда экспертизадан ўтказиш  
СХЕМАСИ**

Босқичлар	Субъектлар	Тадбирлар	Бажариш мuddатлари
<b>Қорақалпоғистон Республикаси Вазирлар Кенгаши томонидан кўриб чиқиладиган маъмурий-худудий тузилиш масалалари</b>			
1-босқич	Қорақалпоғистон Республикаси Вазирлар Кенгаши	Қорақалпоғистон Республикаси Вазирлар Кенгаши томонидан маъмурий-худудий тузилиш масалаларига оид таклифларни худудий комиссияга давлат экспертизасидан ўтказиш учун киритади.	Заруратга кўра
2-босқич	Худудий комиссия	Экспертизадан ўтказди, натижаси юзасидан хулоса қабул қилиб, Қорақалпоғистон Республикаси Вазирлар Кенгашига тақдим этади.	Ўттиз кун мuddатда (алоҳида ҳолларда бир ойдан кўп бўлмаган мuddатга узайтирилади)
3-босқич	Қорақалпоғистон Республикаси Вазирлар Кенгаши	Маъмурий-худудий тузилиш масалаларига оид таклифни, худудий комиссиянинг хулосаси ва бошқа тегишли хужжатларни Қорақалпоғистон Республикаси Жўкорғи Кенгеси Раисига тақдим этади.	Ўн кун мuddатда
4-босқич	Қорақалпоғистон Республикаси Жўкорғи Кенгеси	Қорақалпоғистон Республикаси Жўкорғи Кенгеси Қонунда назарда тутилган ҳолларда Президиумнинг қарорига мувофиқ таклифни ва бошқа тегишли хужжатларни Ўзбекистон Республикаси Олий Мажлиси палаталарига келишиш учун юборади.	Ўн кун ичида
5-босқич	Қорақалпоғистон Республикаси Жўкорғи Кенгеси	Маъмурий-худудий тузилиш масалаларига оид таклифни ва бошқа тегишли хужжатларни Ўзбекистон Республикаси Олий Мажлиси палаталари билан келишгандан сўнг қарор қабул қилади.	Регламент асосида
<b>Туман (шаҳар) ҳокимликлари томонидан киритиладиган маъмурий-худудий тузилиш масалалари</b>			
1-босқич	Туман ҳокимлиги	Маъмурий-худудий тузилиш масалаларига оид таклифларни худудий комиссияга давлат экспертизасидан ўтказиш учун киритади.	Заруратга кўра

Босқичлар	Субъектлар	Тадбирлар	Бажариш муддатлари
2-босқич	Худудий комиссия	Экспертизадан ўтказади, натижаси юзасидан хулоса қабул қилиб, туман ҳокимлигига тақдим этади.	<b>Регламент асосида</b> (алоҳида ҳолларда бир ойдан кўп бўлмаган муддатга узайтирилади)
3-босқич	Туман ҳокимлиги	Маъқулланган хулоса ва тегишли хужжатларни туман халқ депутатлари Кенгашига кўриб чиқиш учун киритади.	<b>Ўн кун муддатда</b>
4-босқич	Халқ депутатлари туман Кенгаши	Киритилган таклифни кўриб чиқади ва натижаси юзасидан қарор қабул қилади. Қабул қилинган қарорни туман ҳокимлигига тақдим этади.	<b>Регламент асосида</b>
5-босқич	Туман ҳокимлиги	Маъмурий-худудий тузилиш масалаларига оид илтимосномани, халқ депутатлари туман Кенгаши қарорини, туман худудий комиссиясининг хулосаси ва бошқа тегишли хужжатларни Қорақалпоғистон Республикаси Вазирлар Кенгашига кўриб чиқиш учун киритади.	<b>Ўн кун муддатда</b>
6-босқич	Қорақалпоғистон Республикаси Вазирлар Кенгаши	Тегишли туман ҳокимининг илтимосномасини кўриб чиқади ва уни маъқуллаш ёки рад этиш тўғрисида қарор қабул қилади.	<b>Ўттиз кун муддатда</b>
7-босқич	Қорақалпоғистон Республикаси Вазирлар Кенгаши	Илтимоснома маъқулланган тақдирда, таклиф тайёрлайди ҳамда маъмурий-худудий тузилиш масалаларига оид илтимосномани, халқ депутатлари туман Кенгаши қарорини, туман худудий комиссиясининг хулосасини бошқа тегишли хужжатлар билан бирга Қорақалпоғистон Республикаси Жўқорғи Кенгесига кўриб чиқиш учун киритади.	<b>Ўн кун ичида</b>
8-босқич	Қорақалпоғистон Республикаси Жўқорғи Кенгеси	Қорақалпоғистон Республикаси Вазирлар Кенгашининг таклифини кўриб чиқади ва натижаси юзасидан тегишли қарор қабул қилади.	<b>Регламент асосида</b>

